

Nandino ŠKRBIĆ imenovan je za direktora JP RTV ZENICA u oktobru 2017. godine, na mandatni period od četiri godine. U oktobru 2021. godine dobio je povjerenje osnivača i udjeličara za još jedan četverogodišnji mandat. Od dolaska na funkciju direktora ovog javnog preduzeća, pokreće niz aktivnosti i inovativnih programa, u cilju obogaćivanja sadržaja na Radiju i Televiziji Zenica, kao i na web portalu (*zenicainfo.ba*).

Idejni je tvorac i jedan od pokretača prvog ljetnog festivala „Zenica Summer Fest“, kao i prvog zimskog festivala „Zenica Adventure“, u okviru kojih su se, na više lokacija u Zenici, u proteklih pet godina, održavali vrhunski muzičko-scenski performansi i zahvaljujući kojima je Grad Zenica upisan u turističku mapu regiona jugoistočne Evrope. Kroz programske sadržaje ova dva festivala (ZSF i ZeAd) tokom proteklih pet godina „prošlo“ je preko milion posjetilaca, a pojedini koncerti u okviru ovih festivala imali su ogromnu pažnju javnosti, kako građana Zenice, tako i posjetilaca iz drugih gradova regiona i obarali rekorde posjete u ovom dijelu Evrope.

Ratne, 1993. godine, nakon što je na inicijativu nekoliko zeničkih humanista 'pokrenuta' poslovnica Dječije ambasade u Zenici, aktivno se uključio u rad i imenovan za Dječijeg ambasadora. Dječija ambasada je 'imala zadatak' da djeci, kroz razne zabavne i kulturne aktivnosti, odvuče pažnju sa ratnih dejstava, u čemu su i uspijevali. 1994. godine pokrenuli su projekat – festival „Djeca pjevaju hitove“, koji je te godine i održan u Sali tadašnjeg Kina 29. novembar u Zenici, uz prisustvo preko 1.000 djece, omladine i roditelja. Kako su rasla ta djeca, učesnici prvog festivala, tako je rastao i sam festival. Iz godine u godinu, festival je postajao ozbiljniji, da bi 2002. godine, na prijedlog RSG radija i PINK televizije, koji su bili partneri u Projektu, bio pokrenut i uspostavljen još jedan festival – Regionalni radijski festival. Zajedno, ta dva festivala, uz učešće neafirmisanih mladih pjevača iz cijele Evrope, kao i mega zvijezda regiona, činili su BH festivalske dane u Zenici – REGIONALNI RADIJSKI I EURO POP FESTIVAL, koji su se održavali na otvorenom, u centru Zenice, krajem augusta mjeseca svake godine, do velike ekonomske krize u svijetu, 2008. godine, kada je, na žalost svih Zeničanki i Zeničana, održano posljednje izdanje ovog velikog festivala.

Od 2002. godine aktivno, kao izvršni direktor Projekta, radi na organizaciji Izbora najuspješnijih poslovnih ljudi i kompanija jugoistočne i srednje Evrope (Najmenadžer), koji se svake godine održava u julu mjesecu u Sarajevu.

Aktivni je član Kamernog simfonijskog orkestra Zenica, najznačajnije kulturno-muzičke institucije u Zeničko-dobojskom kantonu, kao instrumentalist na fagotu, od 1996. godine.

U septembru mjesecu 2015. godine, na poziv Ministarstva vanjskih poslova Narodne Republike Kine, učestvovao na 20-dnevnoj akademskoj razmjeni i studijskoj posjeti nekoliko kineskih pokrajina (Peking, Liaoning, Shandong), kao predstavnik Bosne i Hercegovine, uz predstavnike zemalja 16+1, pod nazivom „Mladi i srednjoročni lideri iz centralne i istočne Evrope“.

Trenutno je na postdiplomskom studiju Pravnog fakulteta Univerziteta u Sarajevu, na katedri pravno-ekonomskih nauka.

Sretno oženjen, otac dječaka (12) i djevojčice (10).